

Na osnovu člana 23 Statuta Brčko distrikta Bosne i Hercegovine, Skupština Brčko distrikta Bosne i Hercegovine, na 93. sjednici održanoj 30. juna 2004. godine, usvaja

ZAKON O ZAŠTITI VODA

I. OPĆE ODREDBE

Član 1

Ovim zakonom uređuje se zaštita voda od zagađivanja i nerazumnog korišćenja.

Zaštita voda obuhvata očuvanje i regulisanje potrebnih količina voda, dobrog stanja, održavanje obale i vodnog zemljišta i donošenje odluka o postizanju racionalno-održivog korišćenja.

Ciljevi zaštite voda

Član 2

Zaštitom voda osigurava se održivo korišćenje voda radi očuvanja i poboljšanja njihovog kvaliteta, očuvanja prirodnih procesa i prirodne ravnoteže voda, biljnih i životinjskih vrsta i njihovih staništa koja zavise o vodama (u daljnjem tekstu: vodni ekosistemi), te osiguravanje potrebnih količina voda za razne namjene.

Načela zaštite voda

Član 3

Polazeći od osnovnih načela zaštite životne sredine, zaštita voda zasniva se na:

- ekonomskom pristupu vodama, sprovođenjem politike da korisnik plaća realnu nadoknadu za korišćenje voda, a zagađivač nadoknađuje štetu prouzrokovanu vodama;
- integritetu riječnih slivova, uzimajući u obzir dinamiku voda i prirodnih procesa i sklad i međuzavisnost vodnih ekosistema u okvirima riječnog sliva;
- u primjenama najboljih raspoloživih tehnologija i novih naučnih saznanja u ekologiji;
- održivom korišćenju voda, koje se zasniva na osiguravanju funkcionisanja prirodnih procesa i održavanju prirodne ravnoteže vodnih ekosistema i na dugoročnoj zaštiti i racionalnom korišćenju raspoloživih vodnih resursa;
- principu predostrožnosti prema kojem gdje postoje prijetnje od ozbiljnih i nepopravljivih oštećenja nedostatak potpune naučne sigurnosti se neće koristiti kao razlog za odlaganje mjera za sprečavanje degradacije životne sredine;
- sprečavanju prekomjernog opterećivanja voda i unapređivanje održivog korišćenja voda.

Nadležnosti u zaštiti voda

Član 4

Za pojedina pitanja zaštite voda nadležan je Brčko distrikt BiH (u daljem tekstu: Distrikt).

Preko svog nadležnog odjeljenja za zaštitu voda Distrikt će sarađivati sa udruženjima i drugim grupama građana, na način utvrđen ovim zakonom.

Planiranje i sprovođenje zaštite voda

Član 5

Zaštita voda od opterećenja, nerazumnog korišćenja i zagađivanja, uključujući i obale i vodno zemljište u zaštićenim i ugroženim područjima, planira se i sprovodi tako da se osigura očuvanje prirodnih procesa, prirodne ravnoteže vodnih ekosistema, zaštićenih prirodnih dobara i područja kao i očuvanje pejzažnih karakteristika voda u skladu sa ovim zakonom.

Svaki pojedinac je obavezan da zaštiti kvalitet i količinu voda koristeći ih tako da u najmanjoj mjeri utiče na ravnotežu vodnih ekosistema, u skladu sa ovim zakonom.

Aktivnosti koje imaju za cilj sprečavanje negativnog uticaja na stanje površinskih i podzemnih voda propisuje gradonačelnik Brčko distrikta BiH u skladu sa Aneksom II Okvirne direktive o vodama 2000/60/EZ, za područje svakog riječnog sliva ili dijela međunarodnog riječnog sliva na teritoriji Brčko distrikta.

Naknade za opterećenje voda

Član 6

Naknade za vode za svako opterećenje, korišćenje i zagađivanje vode, izuzev korišćenja vode za opću upotrebu, regulisat će se Zakonom o fondu za zaštitu životne sredine.

II. DEFINICIJE

Član 7

U smislu ovog zakona slijedeći izrazi imaju značenje:

- voda za kupanje označava vodu u kojoj je dozvoljeno kupanje na osnovu pravnog akta nadležnog organa ili vodu u kojoj kupanje nije zabranjeno i u kojoj se obično kupu veliki broj ljudi;
- voda za piće označava vodu koja ispunjava propisane standarde kvaliteta i koja se može koristiti za piće i proizvodnju i pripremu hrane;
- vode označavaju sve prirodne i vještačke površinske i podzemne vode;
- vodni režim označava skup prirodnih ili vještačkih hidroloških, hemijskih i bioloških karakteristika koje se odnose na površinske i podzemne vode u određenom području u toku određenog vremenskog perioda;
- vodno zemljište označava zemljište stalno ili periodično prekriveno unutrašnjim vodama, koje prema tome predstavljaju posebne hidrološke, geomorfološke i biološke uslove koji definišu vodne ekosisteme i koji dopiru do obale. Vodno zemljište takođe označava i napuštena riječna korita i šljunkovita područja koja voda povremeno plavi. Zemljište povremenih jezera ne označava vodno zemljište;
- direktno ispuštanje u podzemne vode označava ispuštanje zagađujućih materija u podzemnu vodu bez prethodne perkolacije kroz tlo ili podtlo;
- ekološko stanje površinske vode je definisano kvalitetom vodnog ekosistema s obzirom na njegovu strukturu i funkcionisanje;
- eutrofsko područje označava područje u kojem je moguće odrediti ili očekivati sauraciju voda hranljivim materijama, posebno jedinjenjima azota i fosfora koje posebno ubrzavaju rast algi i viših oblika vodenih biljaka i na taj način prouzrokuju neželjeni poremećaj ravnoteže organizama koji su prisutni u vodi i poremećaj kvaliteta vode;
- zagađivanje je direktno ili indirektno uvođenje supstanci ili toplote u vazduh, vodu ili zemljište, koje je rezultat ljudskih aktivnosti i koje može biti štetno po ljudsko zdravlje ili kvalitet vodnih ili zemnih ekosistema koji direktno zavise od vodnih ekosistema, koje rezultira oštećenjima materijalne svojine ili koje narušava ili utiče na uživanje ili druge vrste zakonske upotrebe životne sredine;
- zagađujuća materija označava bilo koju supstancu koja vjerovatno može da prouzrokuje zagađivanje, posebno one navedene u Aneksu VIII Direktive 2000/60/EZ;
- ispiranje se odnosi na čvrste mineralne čestice koje su isprane od površinskih voda i koje se prenose duž korita vodnih tokova ili koje flotizuju vodenom strujom;

- ispitivanje podzemnih voda označava određivanje geološke strukture hidroloških osobina prisutnih stijena i hidrodinamičnih parametara vodnih tokova, primjena mjerenja i uzimanje uzoraka vode za analizu hemijskih, fizičko-hemijskih i mikrobioloških svojstava vode;
- kvantitativno stanje je izraz stepena do koga je podzemna voda pod uticajem direktnih ili indirektnih eksploatacija;
- međudržavne vode označavaju površinske ili podzemne vode koje teku duž granične linije između dvije ili više država ili koje teku preko granične linije;
- mineralna voda označava podzemne vode koje ispunjavaju propisane kriterije za piće i koje se crpe iz bunara, vodnih izvora ili slivova;
- najbolje raspoložive tehnike označavaju najefikasniju i najnapredniju fazu u razvoju djelatnosti i metoda rada koje su naznaka praktične pogodnosti određenih tehnika za osiguravanje osnove za granične vrijednosti emisije, određene da bi se spriječile i gdje to nije praktično moguće smanjile emisije i uticaj na životnu sredinu u cjelini;
- opasne supstance označavaju supstance ili grupe supstanci koje su toksične, postojane i podložne bioakumulaciji, i ostale supstance i grupe supstanci koje prouzrokuju isti nivo zabrinutosti;
- opterećenje voda označava emitovanje supstanci ili energije u vodu;
- opća upotreba vode označava upotrebu na koju se ne primjenjuju specifične zabrane uvedene ovim zakonom (na primjer kupanje i navodnjavanje bašta);
- plutajući materijal označava organske i druge plutajuće materijale (balvane, grane, lišće, otpad i slično);
- površinske vode označavaju unutrašnje vode, izuzev podzemnih voda;
- podzemne vode obuhvataju:
 - a) podzemne vode koje slobodno teku u područjima s poroznim stijenama,
 - b) podzemne vode koje se nalaze u aluvijalnim i terasnim sedimentima u priobalju toka površinskih voda,
 - c) vodni resursi kao prirodni izvori podzemnih voda,
 - d) mineralne, termalne i termomineralne vode:
- područje riječnog sliva označava područje kopna koje se sastoji od jednog ili više susjednih riječnih slivova zajedno sa njihovim podzemnim i obalnim vodama;
- podsliv označava područje zemljišta s koga sve površinske vode otiču pojedinačnim tokovima malih vodotoka, rijeka i/ili jezera u određenu tačku vodnog puta (normalno jezero ili ostrvo rijeke);
- pravo na vodu označava pravo na posebnu upotrebu ili korišćenje vode;
- riječni sliv označava područje zemljišta s koga sve površinske vode otiču pojedinačnim tokovima malih vodotoka, rijeka i/ili jezera u more preko jednog riječnog ušća, rukavca ili delte;
- stajaće vode označavaju prirodna jezera uključujući jezera koja se povremeno javljaju, ribnjake, pojilišta i ostale vodne bazene koji imaju stalno ili periodično uticanje ili isticanje tekućih ili podzemnih voda. Stajaće vode takođe označavaju i vodne bazene koji se formiraju kao rezultat postavljanja brana na tekuće vode ili drugog korišćenja prostora;
- standard kvaliteta životne sredine je koncentracija određene zagađujuće materije ili grupe zagađujućih materija u vodi, sedimentu ili bioti koja ne bi trebalo da bude prekoračena kako bi se zaštitilo zdravlje ljudi i životna sredina;
- tekuće vode označavaju prirodne vodotoke kao što su bujice, potoci i rijeke sa stalnim ili periodičnim tokom i vodotoci koji se formiraju kao rezultat transfera nekog prirodnog vodotoka ili njegovog geografskog položaja;
- termalna voda označava podzemne vode iz bunara, vodnih izvora ili slivova koje ispunjavaju propisane kriterije i imaju temperaturu veću od srednje godišnje temperature područja;

- termomineralna voda je termalna voda s karakteristikama mineralne vode;
- unutrašnje vode označavaju tekuće i stajaće vode na površini zemljišta i sve podzemne vode na strani okrenutoj kopnu, osnovne linije od koje se mjeri širina teritorijalnih voda;
- upotreba ili korišćenje vode označava aktivnost koja izaziva promjene vode, korišćenje vode kao prirodnog resursa ili emitovanje supstanci ili energije u vodu;
- hemijsko stanje vode je definisano koncentracijom supstanci ili energije u vodu;
- hemijsko stanje vode je definisano koncentracijom supstanci i drugih vodnih fenomena;
- štetni uticaji vode označavaju one uticaje vode koji predstavljaju prijetnju po živote ljudi ili njihovu imovinu kao i na životnu sredinu i ljudsko zdravlje.

III. PLANIRANJE ZAŠTITE VODA

Teritorijalna osnova zaštite voda

Član 8

Radi osiguranja integralne i dosljedne zaštite voda, uzimajući u obzir hidrografske karakteristike, jedinstvenost i koherentnost vodnog režima u Distriktu ovim zakonom utvrđuju se riječni slivovi, podslivovi i dijelovi podslivova, kao teritorijalna osnova planiranja i ostvarivanja zaštite voda na teritoriji Distrikta.

Riječni slivovi i podslivovi

Član 9

Na teritoriji Distrikta utvrđuju se riječni slivovi rijeke Save, Brke i Tinje koji se dijele na riječne podslivove.

Riječni podslivovi mogu imati svoje posebne dijelove (dijelovi riječnih podslivova).

Područja riječnih slivova i riječnih podslivova kao i dijelova riječnih podslivova zajedno s podzemnim vodama koje im pripadaju određuje gradonačelnik.

Nadležna organizacija riječnog sliva

Član 10

Zaštita voda na području riječnog sliva, u dijelu koji se nalazi na teritoriji Distrikta, u nadležnosti je organizacije riječnog sliva.

Poslovi upravljanja zaštitom voda, koje obavlja nadležna organizacija riječnog sliva, i način obavljanja tih poslova uređuju se ovim zakonom.

Sva ostala pitanja od značaja za nadležnu organizaciju riječnog sliva (naziv, sjedište, osnivanje, poslovi upravljanja vodama i drugo) utvrđuju se posebnim zakonom, kojim se uređuje upravljanje vodama na teritoriji Distrikta.

Nadležna organizacija riječnog sliva osniva se posebnim zakonom kojim se uređuje upravljanje vodama na teritoriji Distrikta.

Vrste planskih akata

Član 11

Gradonačelnik donosi akt o strategiji zaštite voda i planova zaštite riječnih slivova, riječnih podslivova i dijelova riječnih podslivova.

Pored planova iz stava 1 ovog člana, mogu se donositi pomoćni planovi koji se odnose na pojedinačna pitanja zaštite voda (pomoćni planovi).

Strategija zaštite voda Distrikta

Član 12

Strategijom zaštite voda Distrikta utvrđuje se politika zaštite voda.

Strategija zaštite voda Distrikta sadrži naročito:

1. Karakteristike riječnih slivova na teritoriji Distrikta;
2. ciljeve i smjernice za:
 - zaštitu voda od opterećenja i poboljšavanje njihovog kvaliteta,
 - očuvanje i regulaciju količine voda radi očuvanja ili uspostavljanja prirodne ravnoteže, vodnih ekosistema biodiverziteta i pejzažnih karakteristika,
 - očuvanje i regulaciju količine voda radi osiguravanja zaliha vode za piće i ostalih oblika upotrebe voda,
 - ekonomski proračun zaštite voda,
 - način primjene međunarodnih obaveza države vezanih za oblast zaštite voda na teritoriji Distrikta,
 - mehanizme koordinacije za riječne slivove i riječne podslivove sa entitetima i Vijećem ministara BiH,
 - načela uspostavljanja mehanizama koordinacije za riječne slivove i riječne podslivove s drugim državama,
3. određivanje prioriteta za postizanje ciljeva zaštite voda;
4. proračun sredstava koja su potrebna za primjenu Strategije.

Član 13

Strategiju Distrikta o zaštiti voda donosi Skupština Brčko distrikta BiH na prijedlog gradonačelnika, za period od najmanje deset godina.

Strategija iz stava 1 ovog člana može biti dio Strategije zaštite životne sredine BiH.

Plan zaštite područja riječnog sliva

Član 14

Plan zaštite područja riječnog sliva sadrži:

1. opis stanja riječnog sliva, koji sadrži:
 - administrativne, demografske i socijalno-ekonomske karakteristike,
 - karakteristike površinskih i podzemnih voda koje mu pripadaju, uključujući i granične vode,
 - uticaje i opterećena površinskih i podzemnih voda koji su rezultat ljudskih aktivnosti, uključujući i procjenu i analizu sprovedenih mjerenja,
 - određivanje osjetljivih i neosjetljivih područja, ranjivih zona i zaštićenih područja prema ovom zakonu i zaštićenih područja prema propisima koji se odnose na očuvanje prirode za koje su značajni vodni režim i kvalitet vode,
 - opis mreže monitoringa stanja površinskih i podzemnih voda i zaštićenih i ugroženih područja,
 - određivanje postojećih planova koji se odnose na konkretno područje,

- spisak institucija koje su nadležne za pojedinačna pitanja vezana za upravljanje vodama i zaštiti voda;
- 2. ekonomski proračun zaštite voda, regulisanje uslova drenaža i upotrebe vode;
- 3. ciljeve zaštite voda u pojedinačnim područjima riječnih slivova;
- 4. program mjera, uključujući i razvoj finansijske osnove za postizanje ciljeva iz tačke 3 ovog stava;
- 5. opis djelatnosti i zaključci vezani za učešće javnosti u pripremi plana, uključujući monitoring u lokalnim zajednicama;
- 6. određivanje ograničenja i uslova za upotrebu vode.

Odredbe stava 1 ovog člana shodno se primjenjuju na određivanje sadržaja planova za riječne podslivove i dijelove riječnih podslivova.

Detaljniji sadržaj planova iz prethodnih stavova ovog člana propisuje gradonačelnik.

Član 15

Predlagači planova obavještavaju javnost o početku pripreme pojedinih planova najmanje tri godine prije početka perioda na koji se plan odnosi i osiguravaju učešće javnosti u pripremi i usvajanje relevantnog plana.

Prije početka pripreme pojedinih planova, predlagač poziva na saradnju nadležne republičke i lokalne organe, javne službe, nevladine i druge organizacije, nosioce prava na vodu i ostala lica, koja su, u području koje je obuhvaćeno planom, vlasnici obale ili vodnog zemljišta ili koji u tom području imaju prebivalište ili sjedište i upoznaje ih sa prijedlogom sadržaja i rasporedom izrade i usvajanja plana. O početku pripreme pojedinog plana i njegovom usvajanju šira javnost se obavještava putem medija.

U skladu sa stavom 2 ovog člana, predlagač osigurava i saradnju javnosti u toku pripreme plana i mora upoznati javnost sa izvještajem o napredovanju na pripremi plana najmanje dvije godine prije početka perioda na koji se plan odnosi.

Predlagač mora objaviti nacrt plana najmanje godinu dana prije početka perioda na koji se plan odnosi.

Lica iz stava 2 ovog člana mogu predlagaču plana podnijeti pisane primjedbe na nacrt plana u roku od šest mjeseci nakon njegovog objavljivanja, a na njihovo traženje predlagač im mora osigurati pristup dokumentima na osnovu kojih je plan izrađen.

Član 16

Plan zaštite područja riječnog sliva donosi gradonačelnik na prijedlog nadležne organizacije područja riječnog sliva. Plan zaštite riječnog sliva mora biti u skladu sa strategijom zaštite voda Distrikta.

Plan iz stava 1 ovog člana ponovno se razmatra svakih šest godina i ukoliko je potrebno, mijenja ili dopunjuje po postupku po kojem je donesen.

Izmjene i dopune plana vrše se na način i po postupku njegovog usvajanja.

Planovi se objavljuju u "Službenom glasniku Brčko distrikta BiH".

Polazna osnova planiranja prostora

Član 17

Predlagači akata prostornog planiranja moraju u toku pripreme ovih akata kao jednu od obaveznih polaznih osnova uzeti u obzir ograničenja i uslove iz planova zaštite voda.

IV. ZAŠTITA VODA I VODNIH EKOSISTEMA

Član 18

Zaštita voda i vodnih ekosistema uključuje klasifikaciju površinskih i podzemnih voda, zabrane i ograničenja koja se odnose na opterećenja voda, posebne zabrane i ograničenja u zaštićenim područjima, kontrolu i prikupljanje podataka za zaštitu voda i druge mjere utvrđene ovim zakonom.

Ciljevi zaštite kvaliteta

Član 19

Cilj zaštite kvaliteta voda je osiguravanje dobrog stanja voda i životne sredine, radi zaštite ljudskog zdravlja i interesa potrošača.

Član 20

Dobro stanje površinskih voda označava dobro ekološko i hemijsko stanje. Dobro ekološko stanje postoji ukoliko uslovi na određenoj lokaciji samo neznatno odstupaju od čistih/prvobitnih stanja koje odgovara određenom tipu vode. Ovi čisti/prvobitni uslovi se utvrđuju i klasifikuju na osnovu abiotičkih kriterija kao što su visina, ispuštanje, režim protoka i sl., koji se odnose na izabrane referentne lokacije.

Dobro hemijsko stanje/karakteristike postoje ukoliko hemijske supstance koje se nalaze u vodi, sedimentima i bioti ne utiču na ljudsko zdravlje, raznolike zahtjeve potrošača i posebno na dobro ekološko stanje/karakteristike utvrđene prethodnim stavom ovog člana.

Član 21

Dobro stanje/karakteristike podzemnih voda označava dobro kvantitativno i hemijsko stanje/karakteristike.

Dobro kvantitativno stanje/karakteristike označava stalan nivo podzemnih voda u dužem vremenskom periodu kojim se sprečava štetan uticaj na povezane površinske vode i kopnene ekosisteme. Dobro hemijsko stanje/karakteristike označavaju hemijski kvalitet vode koji nije štetan za zdravlje ljudi, ispunjava raznolike potrebe potrošača i sprečava negativan uticaj na kvalitet zavisnih vodnih ekosistema površinskih voda.

Grafične vrijednosti i klasifikacija

Član 22

Grafične vrijednosti za hemijske, fizičko-hemijske i biološke parametre za vode za kupanje, vode namijenjene za vodosnabdijevanje i za mineralne, termalne i termomineralne vode određuje gradonačelnik.

Shemu klasifikacije voda, u skladu sa utvrđenim grafičnim vrijednostima, propisuje gradonačelnik. Nadležna organizacija riječnog sliva vrši kategorizaciju svojih područja u skladu s propisanom shemom klasifikacije.

Planovima zaštite riječnih slivova osigurava se postizanje ciljeva zaštite kvaliteta voda predviđenih ovim članom u vremenskom periodu za koji je donesen plan zaštite riječnog sliva. Shema klasifikacije i kategorizacija voda iz prethodnih stavova ovog člana obavezan je element planova zaštite voda.

1. OPĆE MJERE ZAŠTITE VODA

Ispuštanje otpadnih voda

Član 23

Ispuštanje otpadnih voda i emisija toplote u površinske vode i apsorpcija toplote s površinskih voda mogu se vršiti samo na način i pod uslovima utvrđenim ovim zakonom.

Zabranjeno je direktno ispuštanje otpadnih voda u podzemne vode.

Indirektno ispuštanje otpadnih voda i emisija toplote u podzemne vode i apsorpcija toplote iz podzemnih voda može se vršiti samo na način i pod uslovima određenim ovim zakonom.

Zabranjeno je ispuštanje otpadnih voda u prirodna jezera, ribnjake, pojilišta ili prirodne vodne bazene sa stalnim ili periodičnim ulijevanjem ili izlivanjem kopnenih i podzemnih voda, i ispuštanje u vodne bazene prilikom vađenja ili korišćenja sirovih minerala i drugih sličnih slučajeva upotrebe voda.

Zabranjeno je korišćenje ili upotreba voda koja degradira hemijsko ili ekološko stanje voda u prirodnim jezerima, ribnjacima, pojilištima i drugim prirodnim vodnim bazenima sa stalnim ili periodičnim ulivanjem i izlivanjem površinskih i podzemnih voda.

Upotreba đubriva i sredstava za zaštitu bilja

Član 24

Đubrenje ili korišćenje sredstava za zaštitu bilja na obalnom zemljištu zabranjeno je u širini zemljišta od 10 metara od granice obale unutrašnje vode.

Zone u kojima su podzemne vode zagađene nitratima ili sredstvima za zaštitu bilja ili u kojima postoji vjerovatnoća za pojavu zagađivanja ukoliko se ne preduzmu adekvatne mjere u osjetljivim zonama određuje gradonačelnik. Nadležna organizacija riječnog sliva može u ovim zonama ograničiti, urediti ili zabraniti upotrebu vještačkih đubriva, prirodnih gnojiva ili sredstava za zaštitu bilja.

Pravila dobre poljoprivredne prakse za smanjenje zagađenja vode nitratima i sredstvima za zaštitu bilja utvrđuje ministar nadležan za zaštitu životne sredine. Primjena dobre poljoprivredne prakse obavezna je u osjetljivim zonama.

Monitoringu voda u osjetljivim područjima posvećuje se posebna pažnja.

Plovidba i zagađenje voda

Član 25

Prevoz tereta plovnim objektima koja kao pogonsko gorivo koriste naftu zabranjen je na unutrašnjim vodama, osim u vanrednim slučajevima zaštite voda, spašavanja ljudi, životinja i imovine, sprovođenja policijskih zadataka i u slučaju vojne odbrane.

Izuzetno od prethodnog stava nadležno odjeljenje Vlade Distrikta može dozvoliti da se pojedine površinske/unutrašnje vode i njihovi dijelovi koriste za prevoz tereta ili korišćenje plovnih objekata iz stava 1 ovog člana, i tada se primjenjuju odredbe o općoj upotrebi voda, njihovoj zaštiti od zagađenja i očuvanju prirodne ravnoteže vodnih ekosistema.

Zabranjeno je ispuštanje otpadnih voda direktno iz plovnih objekata, osim nezagađene vode za hlađenje.

Član 26

Zabranjeno je pranje vozila i drugih mašina i uređaja u površinskim vodama, ili na obali ili vodnom zemljištu.

Nagomilavanje i odlaganje materija

Član 27

Zabranjeno je ispuštanje, polaganje i odlaganje u vode supstanci ili objekata, koji zbog svoje forme, fizičkih, hemijskih ili bioloških karakteristika ili drugih osobina, mogu da ugroze život ili zdravlje ljudi i vodne ekosisteme, da otežaju tok voda ili da ugroze vodne objekte i uređaje.

Zabranjuje se na vodnom i obalnom zemljištu deponovanje i pretovar opasnih materija, bilo u čvrstom, tečnom ili gasovitom stanju te odlaganje ili deponovanje ekstrahovanih ili otpadnih materija ili drugih sličnih supstanci i odlaganje otpada.

Opasne supstance

Član 28

Zabranjena je izgradnja na vodnom zemljištu; postrojenja ili uređaja namijenjenih proizvodnom procesu u koji su uključene opasne supstance, postrojenja ili uređaji za rukovanje opasnim supstancama ili za njihovo skladištenje i postrojenja ili uređaji za odlaganje otpada.

Izgradnja postrojenja i uređaja iz stava 1 ovog člana izuzetno je dozvoljena za potrebe luka i odbranu zemlje.

Za izgradnju postrojenja i uređaja u skladu sa st. 1 i 2 ovog člana na obalnom i vodnom zemljištu gradonačelnik može propisati posebne uslove.

Prevoz i pretovar opasnih materija na rijekama vrši se u skladu s posebnim propisima o prevozu opasne robe kojim se isključuje mogućnost nekontrolisanog ispuštanja ili svodi na najmanju moguću mjeru.

Akcidenti

Član 29

Lice koje prouzrokuje ili je svjedok ispuštanja odlaganja ili deponovanja opasnih ili štetnih supstanci u vode ili na obalno ili vodno zemljište, ili na zemljište koje se nalazi u zaštićenom području, kao i u slučaju neposredne opasnosti od navedenih aktivnosti, dužno je da odmah obavijesti nadležnu organizaciju riječnog sliva o događaju ili neposrednoj opasnosti. U skladu s propisima o zaštiti od prirodnih i drugih katastrofa, nadležna organizacija riječnog sliva mora učiniti sve u svojoj moći kako bi se štetne posljedice na životnu sredinu svele na najmanju moguću mjeru.

Po uputstvima nadležne organizacije riječnog sliva, javno preduzeće koje gazduje vodama na području akcidenta obavezno je da preduzme sve mjere za uklanjanje opasnosti ili štetnih uticaja zagađenja, odmah nakon što je obaviješteno.

Troškove otklanjanja posljedica zagađenja snosi subjekat koji je izazvao zagađenje (počinilac) koji takođe snosi i troškove sprovođenja mjera i aktivnosti iz stava 2 ovog člana.

Mjere koje se preduzimaju u slučaju akcidenata propisuje gradonačelnik na prijedlog nadležnog odjeljenja Vlade.

Opterećivanje površinskih voda

Član 30

Kod bilo kog opterećenja površinskih voda, obale ili vodnog zemljišta, radi zaštite biljnih i životinjskih vrsta i njihovih staništa, koji ovise o vodi, mora se obratiti pažnja na:

- održavanje uslova za reprodukciju tih biljnih i životinjskih vrsta;
- održavanje odgovarajućih uslova u njihovim zimskih skloništima vodnih ekosistema;
- održavanje ostalih uslova važnih za održavanje i razvoj vodnih ekosistema i vrsta, uključujući zamjenu i obogaćivanje;
- očuvanje postignutog dobrog stanja voda.

Obaveze iz stava 1 ovog člana detaljno se određuje u vodozaštitnoj saglasnosti.

Za pojedine vrste opterećenja vode obale ili vodnog zemljišta, gradonačelnik može, u skladu s propisima o očuvanju prirode, propisati detaljnije uslove i metode zaštite voda, koje sadržava vodozaštitna saglasnost, uključujući i obavezu prolaza za životinjske vrste.

Očuvanje uslova drenaže

Član 31

Opterećenje životne sredine može biti takvog intenziteta da osigurava očuvanje, u što većoj mogućoj mjeri, stanja voda, vodnih ekosistema i smanjenje ugrožavanja nizvodnog toka, a naročito uslova drenaže.

Ekološki prihvatljiv minimalan protok

Član 32

U slučaju upotrebe ili korišćenja tekuće vode, koje bi mogle smanjiti njen protok, ekološki prihvatljiv minimalan protok mora biti osiguran u toku cijele godine, osim onda kada je prirodni protok niži od određenog ekološki prihvatljivog protoka.

Ekološki prihvatljiv protok predstavlja najmanju količinu vode koja osigurava očuvanje prirodne ravnoteže vodnih ekosistema i pejzažnih karakteristika vodotoka.

Ekoloških prihvatljiv protok se određuje odlukom o davanju prava na vodu na osnovu stručnog mišljenja javnog preduzeća nadležnog za gazdovanje vodama.

Troškove stručnog mišljenja stava 3 ovog člana snosi investitor na osnovu metodologije koju propisuje gradonačelnik u skladu s propisima o očuvanju prirode.

Vrste upotrebe ili korišćenja vode, prema stavu 1 ovog člana, propisuje gradonačelnik.

Uklanjanje materijala

Član 33

Uklanjanje materijala kao što je šljunak, pijesak i sl. dozvoljava se samo u onoj mjeri i na način, kojim se osigurava da se prirodni procesi neće znatno izmijeniti, da neće biti uništena prirodna ravnoteža vodnih ekosistema i da se neće povećati negativan uticaj na vode.

Bliže uslove i metode uklanjanja i vraćanja materijala, kao i kriterije kojima se određuje količina materijala koja se uklanja, propisuje gradonačelnik.

2. POSEBNE MJERE ZAŠTITE VODA

Zaštićena vodna područja

Član 34

Nadležna organizacija riječnog sliva određuje zaštićena područja radi zaštite vodnih tokova ili dijelova vodnih tokova putem kojih podzemne vode teku prema slivnim područjima da bi se koristile za javno snabdijevanje vodom za piće, flaširanje prirodne vode za piće ili za korišćenje mineralne, termalne ili termomineralne vode za proizvodnju pića, zaštite protiv zagađenja ili drugih vrsta opterećenja voda, koja bi mogla uticati na zdravstvenu podobnost vode i na njenu količinu, i za zaštitu područja iznad tokova vode iz kojeg površinske vode otiču ili se slivaju u vodni tok.

U cilju uspostavljanja različitih nivoa zaštite, zaštićeno vodno područje se klasifikuje u zaštićene vodne pojaseve.

Zaštitu voda u zaštićenim vodnim područjima organizuju i sprovode nadležne organizacije riječnog sliva i javno preduzeće nadležno za gazdovanje vodama, svako u okviru svojih nadležnosti.

Pravila zaštite voda u zaštićenim vodnim područjima utvrđuje gradonačelnik u skladu sa odredbama ovog zakona, a naročito:

- mjere, zabrane i organičenja u zaštićenim vodnim područjima i pojedinačnim zaštićenim vodnim pojasevima (u daljem tekstu: režim zaštite voda);
- metoda finansiranja zaštite i održavanja područja;
- nadzor sprovođenja propisanog režima.

Privremena zaštita

Član 35

Ukoliko se otkrije izvor vode koji je bitan za snabdijevanje vodom za piće, ili izvor mineralne, termalne ili termomineralne ili druge podzemne vode za proizvodnju pića, gradonačelnik na prijedlog nadležne organizacije riječnog sliva može donijeti odluku o privremenoj zaštiti područja na kojem se izvor nalazi.

Odlukom o privremenoj zaštiti iz stava 1 ovog člana određuje se:

- granice zaštićenog vodnog područja;
- privremeni režim zaštite voda u zaštićenom vodnom području i pojedinačnim zaštićenim pojasevima;
- metode finansiranja zaštite i održavanja područja;
- nadzor sprovođenja propisanog režima.

Zaštita iz stava 2 ovog člana može biti na snazi samo do stupanja na snagu akta o određivanju zaštićenog vodnog područja na osnovu člana 35 stav 1 ovog zakona.

Zaštita voda u području iz stava 1 ovog člana vrši se u skladu s članom 35 stav 3 ovog zakona.

Režim zaštite voda

Član 36

U zaštićenom vodnom području mogu se ograničiti ili zabraniti aktivnosti koje mogu ugroziti kvantitativno ili kvalitativno stanje izvora voda. Vlasnicima ili drugim posjednicima zemlje u zaštićenom vodnom području mogu se odrediti obaveze da sprovedu ili dozvole sprovođenje mjera za zaštitu kvantiteta i kvaliteta izvora vode.

Ograničenja iz stava 1 ovog člana odnose se na:

- zabranu ili određivanje posebnih uslova korišćenja prostora;
- zabranu ili ograničenje izvođenja određenih aktivnosti;
- zabranu ili ograničenje prevoza roba ili ljudi.

Pravo svojine na zemljištu koje se nalazi unutar zaštićenog vodnog područja za snabdijevanje vodom za piće može se opozvati u skladu s propisima o eksproprijaciji ukoliko je nemoguće postići zaštitu kvaliteta i kvantiteta izvora vode na osnovu ograničenja i zabrana iz stava 2 ovog člana.

Zaštićena područja rezervi površinskih voda

Član 37

Pored zaštićenih područja iz člana 34 i člana 35 ovog zakona, nadležna organizacija riječnog sliva može odrediti zaštićena područja rezervi površinskih voda.

Područja iz stava 1 ovog člana uspostavljaju se na osnovu određenih rezervi površinskih voda koje se, s obzirom na svoje hemijske, fizičko-hemijske ili mirkobiološke karakteristike, klasifikuju u najviši red.

U područjima iz stava 2 ovog člana, opterećenje prostora i aktivnosti koje mogu ugroziti hemijsko ili kvantitativno stanje površinskih voda, mogu se ograničiti ili zabraniti.

Osjetljiva područja

Član 38

Osjetljivim područjima u smislu ovog zakona smatraju se:

- prirodna slatkovodna jezera, ostale slatke vode i obalne vode za koje je utvrđeno da su eutrofske ili koje u bližoj budućnosti mogu postati eutrofske ukoliko se ne preduzmu mjere zaštite;

- površinske slatke vode, namijenjene za korištenje vode za piće koje bi mogle sadržavati veću koncentraciju nitrata od one utvrđene zakonom;

- područja u kojima je neophodna dodatna obrada kako bi se postigao kvalitet voda dobrog stanja.

Manje osjetljiva područja su područja gdje ispuštanje otpadnih voda ne izaziva štetne uticaje na životnu sredinu ili gdje nije vjerovatno da će se takvi uticaji pojaviti u budućnosti kao rezultat morfoloških, hidroloških ili specifičnih hidroloških uslova koji postoje u tom području, uzimajući u obzir rizik da bi se ispušteno zagađenje moglo prenijeti na susjedna područja u kojima može prouzrokovati štetne uticaje na životnu sredinu.

Osjetljiva i manje osjetljiva područja određuje gradonačelnik u skladu s kriterijima utvrđenim u stavovima 1 i 2 ovog člana.

U osjetljivom ili manje osjetljivom području, gradonačelnik može odrediti obaveze izgradnje i opremanja za postrojenja za preradu otpadnih voda (uključujući i minimalne vrijednosti prečišćavanja i granične vrijednosti za efluente), uzimajući u obzir i broj stanovništva na području. Za osjetljiva područja mogu se primijeniti stroži kriteriji za postrojenja za preradu otpadnih voda.

Nadležna organizacija riječnog sliva može odlučiti da se u osjetljivom ili manje osjetljivom području mogu ispuštati komunalne otpadne vode, i to samo ukoliko su prečišćene do utvrđenih graničnih vrijednosti.

U osjetljivom području posvećuje se posebna pažnja monitoringu voda.

Vodna područja namijenjena za kupanje

Član 39

Područja namijenjena za kupanje utvrđuje se u planu zaštite riječnog sliva a prostornim planom lokalne zajednice utvrđuje se područje namijenjeno za organizovana kupanja.

U području iz stava 1 ovog člana nije dozvoljeno podizanje stalnog ili privremenog postrojenja ili drugih prepreka koje bi sprečavale slobodan prolaz duž voda.

Kupališna područja moraju biti zaštićena od zagađenja i od ostalih oblika korišćenja ili pojava koje bi mogle uticati na podobnost vode za kupanje.

U cilju zaštite od zagađenja, aktivnosti koje bi mogle ugroziti zdravlje ili živote kupaca moraju biti ograničene ili zabranjene u vodnim područjima namijenjenim za kupanje.

Zabrane i ograničenja u područjima namijenjenim za kupanje propisuje nadležna organizacija područja riječnog sliva u skladu sa ovim zakonom i propisima iz oblasti zaštite životne sredine.

Označavanje zaštićenih područja

Član 40

Zaštićena područja i kupališta moraju biti označena.

Zaštićena vodna područja označava javno preduzeće nadležno za snabdijevanje vodom za piće, osim zaštićenih područja čija voda je mineralna, termalna, termomineralna ili druga površinska voda za proizvodnju pića, u kom slučaju odgovornost ima onaj ko zadržava pravo na vode.

Označavanje kupališta osigurava nadležno odjeljenje Vlade.

Način označavanja zaštićenih područja i kupališta propisuje gradonačelnik.

Renaturalizacija površinskih voda

Član 41

U cilju poboljšanja narušene prirodne ravnoteže vodnih ekosistema površinskih voda, nadležna organizacija vrši njihovu renaturalizaciju, u skladu sa planovima riječnog sliva i riječnih podslivova.

Planovima iz stava 1 ovog člana utvrđuje se klasifikacija renaturalizacije u hitnu, potrebnu i preporučljivu i određuju se mjere i način renaturalizacije.

Renaturalizacija se realizuje prema programu koji donosi nadležna organizacija riječnog sliva u saradnji sa organizacijom nadležnom za očuvanje prirode, a program odobrava gradonačelnik.

Kriterije klasifikacije iz stava 2 ovog člana utvrđuje gradonačelnik.

Naknada

Član 42

Vlasnik zemljišta koje se nalazi u zaštićenom vodnom području može zahtijevati od lokalne zajednice razmjenu svog zemljišta za drugo odgovarajuće zemljište na istom području, ili njegovu kupovinu, u slučaju da ograničenja i zabrane iz članova 36 – 43 ovog zakona u značajnoj mjeri onemogućavaju vlasnika u korišćenju zemljišta ili ukoliko je korišćenje zemljišta trajno onemogućeno.

Ukoliko lokalna zajednica ne ponudi odgovarajuće zemljište i ukoliko nije zainteresovana za kupovinu, vlasnik može zahtijevati naknadu tržišne vrijednosti zemljišta.

Troškove razmjene, kupovine ili naknade iz stava 1 ovog člana snosi lokalna zajednica koja se snabdijeva vodom za piće iz zaštićenog vodnog područja.

Ukoliko je zaštićeno vodno područje namijenjeno iskorišćavanju termalnih, mineralnih ili termomineralnih i drugih površinskih voda za proizvodnju pića onda troškove razmjene, kupovine ili isplate naknada snosi nosilac prava na vode.

Naknada se utvrđuje prema propisima o eksproprijaciji, u skladu sa odredbama ovog zakona.

3. VODOZAŠTITNA SAGLASNOST

Slučajevi izdavanja saglasnosti

Član 43

Vodozaštitna saglasnost izdaje se u slučajevima direktne upotrebe ili korišćenja voda za:

1. privatno snabdijevanje vodom za piće ili snabdijevanje vodom za piće predviđeno kao javna komunalna služba;
2. tehnološke svrhe;
3. kupališta,
4. proizvodnju toplote;
5. navodnjavanje poljoprivrednog zemljišta ili drugih područja;
6. proizvodnju električne energije i hidroelektranama sa ukupnim potencijalom dijela vodotoka koji se koristi manjim od 1 MW,
7. pogonske vodne mlinove, pilane ili slične uređaje;
8. uzgoj vodenih organizama, osim za uzgoj u ribnjacima u skladu s propisima koji regulišu slatkovodno ribarstvo;
9. izgradnju luke;
10. za ispuštanje otpadnih voda i emisiju toplote u vode;
11. druga opterećenja voda, koja prevazilaze opću upotrebu u skladu sa ovim zakonom za koje nije potrebna koncesija.

Vodozaštitna saglasnost izdaje se i za korišćenje vode u tehnološke svrhe, ako se koristi voda sa uređaja i postrojenja, koja su namijenjena za snabdjevanje vodom za piće.

Listu aktivnosti direktnog korišćenja ili upotrebe voda za koje nije potrebna vodozaštitna saglasnost, uvrđuje gradonačelnik Brčko distrikta BiH.

Ukoliko direktno korišćenje ili upotreba vode nije na listi iz stava 3 ovog člana, smatra se da je za tu aktivnost potrebna vodozaštitna saglasnost.

Voda se može koristiti bez prethodno pribavljene vodozaštitne saglasnosti u slučaju zaštite od požara i radi preduzimanja hitnih i sanitarnih mjera.

Svrha i karakter saglasnosti

Član 44

Vodozaštitna saglasnost obavezno se prilaže uz zahtjev za izdavanje ekološke dozvole, odobrenja za građenje, vodoprivredne dozvole ili drugih dozvola ili odobrenja propisanih posebnim zakonom.

Vodozaštitna saglasnost je uslov za izdavanje dozvola i odobrenja iz stava 1 ovog člana, a može se pobijati žalbom protiv dozvole ili odobrenja, koje je doneseno na osnovu vodozaštitne saglasnosti.

Vodozaštitna saglasnost donosi se po posebnom postupku koji propisuje gradonačelnik.

Zahtjev za izdavanje saglasnosti

Član 45

Obrazac zahtjeva za izdavanje vodozaštitne saglasnosti propisuje nadležno odjeljenje Vlade, a on mora najmanje da sadrži:

- podatke o podnosiocu zahtjeva,
- podatke o vodi koje podnosilac zahtjeva namjerava da koristi,
- podatke o namjeni korišćenja,
- podatke o pravu na vodu podnosioca zahtjeva,
- detaljan opis vrste, obima i namjene prava na vodu koje podnosilac zahtjeva želi da dobije,
- vremenski period za koji se traži korišćenje vode.

Zahtjev za izdavanje vodozaštitne saglasnosti podnosi se nadležnoj organizaciji riječnog sliva.

Izdavanje saglasnosti

Član 46

Vodozaštitnu saglasnost izdaje nadležno odjeljenje Vlade za područja riječnog sliva. Vodozaštitna saglasnost izdaje se:

- ako je korišćenje vode moguće na osnovu plana zaštite voda riječnog sliva;
- ako korišćenje vode ne degradira, ograničava ili onemogućava ostvarenje prava na vodu drugih korisnika.

Vodozaštitna saglasnost ne može se izdati za postojeća postrojenja i uređaje koji ispuštaju otpadne vode ili opasne i štetne materije u vode, atmosferu ili zemljište.

Vodozaštitna saglasnost se izdaje za određeno vrijeme ne duže od 15 godina.

Važenje vodozaštitne saglasnosti može se produžiti na zahtjev korisnika ako svi propisani uslovi za izdavanje saglasnosti postoje u vrijeme produženja važenja saglasnosti.

Sadržaj saglasnosti

Član 47

Vodozaštitna saglasnost sadrži:

1. podatke o korisniku prava na vodu,
2. detaljan opis vrste, obima i svrhe prava na vodu,
3. dužinu trajanja,
4. način i uslove korišćenja, uključujući obaveze monitoringa, koje korisnik prava na vodu i mora poštovati tokom ostvarenja prava na vodu,
5. određivanje plaćanja prava na vodu i vodne naknade,
6. mjere koje je korisnik prava na vodu dužan sprovesti kada pravo na vodu istekne,
7. ostale obaveze koje korisnik prava na vodu mora ispuniti u skladu sa ovim zakonom i propisima koji su izdati na osnovu ovog zakona.

Baza podataka i monitoring

Član 48

Nadležna organizacija riječnog sliva dužna je da izradi i održava informacijski sistem zaštite voda na svojoj teritoriji.

Informacijski sistem zaštite voda riječnog sliva zasniva se na:

1. stalnom monitoringu kvaliteta i kvantiteta voda,
2. informacijama koje se sakupljaju putem postupaka izdavanja dozvola, saglasnosti i koncesija,
3. podacima iz monitoringa koji vrše sami korisnici voda,
4. vodnim knjigama i katastrima,
5. javnom monitoringu.

Sistem monitoringa kojim rukovodi nadležna organizacija riječnog sliva sadrži bar slijedeće elemente:

- za površinske vode:

1. količinu i prostor protoka koji utiče na ekološko i hemijsko stanje i ekološki potencijal voda;
2. ekološko i hemijsko stanje i ekološki potencijal voda;
 - za podzemne vode: hemijsko i kvantitativno stanje;
 - za zaštićena područja, pored elemenata iz alineja 1 i 2 ovog člana i elemente sadržane u zakonskim propisima po kojima je određeno područje proglašeno zaštićenim.

Bazom podataka o zaštiti voda rukovodi se putem kompjuterizovanog Geografskog informacionog sistema (GIS) i Interneta.

Gradonačelnik donosi propise o jedinstvenom sadržaju i metodologiji baze podataka zaštite voda riječnog sliva, posebno o gustini lokacija za monitoring, učestalosti i metodologiji uzorkovanja, listi obaveznih parametara, metodama analize i algoritmima procjene i nizu pogona koji su obavezni da sami sprovedu monitoring ili na drugi način osiguraju podatke vezane za zaštitu voda.

V. ORGANIZACIJA ZAŠTITE VODA

Upravljanje zaštitom voda

Član 49

Zaštitom voda riječnog sliva upravlja nadležna organizacija područja riječnog sliva, na način i pod uslovima utvrđenim ovim zakonom.

Sastav upravnog odbora

Član 50

Upravni odbor nadležne organizacije područja riječnog sliva sastoji se od članova koje imenuje:

- jednog člana, gradonačelnik;
- jednog člana iz preduzeća nadležnog za gazdovanje vodama;
- jednog člana iz osnovnog komunalnog preduzeća iz područja riječnog sliva;
- jednog člana iz nevladinih organizacija koje se bave zaštitom životne sredine.

U slučaju da neka institucija ili grupacija iz stava 1 ovog člana ne imenuje člana upravnog odbora, imenovanje vrši gradonačelnik.

Nadležnost i rad upravnog odbora

Član 51

Upravni odbor:

1. donosi plan zaštite voda riječnog sliva;
2. donosi statut i akt o organizaciji rada i sistematizaciji radnih mjesta nadležne organizacije riječnog sliva uz saglasnost gradonačelnika;
3. donosi godišnji program rada i finansijski plan, te usvaja izvještaje o radu i godišnje obračune;
4. odlučuje o drugim pitanjima utvrđenim statutom i drugim općim aktima.

Upravni odbor radi na sjednicama koje se održavaju najmanje jednom mjesečno. Sjednica upravnog odbora može se održati ako sjednici prisustvuje većina od ukupnog broja članova, a odluke na sjednici donose se većinom glasova prisutnih članova, ako statutom ili drugim općim aktom nadležne organizacije riječnog sliva nije za donošenje pojedinih odluka propisana posebna većina glasova.

Način rada upravnog odbora utvrđuje se poslovníkom.

Zajednička zasjedanja

Član 52

Upravni odbor zasjeda zajedno sa upravnim odborom odgovarajuće organizacije istog riječnog sliva iz entiteta, svakog drugog mjeseca, radi:

- utvrđivanja elemenata, pokazatelja i metodologije za izradu, pripremanje i utvrđivanje planova zaštite voda riječnog sliva u oba entiteta;
- uspostavljanja saradnje i koordinacije u procesu izvršavanja planova zaštite voda riječnog sliva;
- utvrđivanja programa zajedničkog monitoringa, procjena stanja voda, istraživanja, razvoja i drugih zajedničkih aktivnosti;
- razmjene informacija, konsultacija, pružanja uzajamne pomoći, koordiniranja sistema komunikacije, upozoravanja i uzbunjivanja u kritičnim situacijama, informisanja javnosti i drugih pitanja od zajedničkog interesa.

Nadzorni odbor

Član 53

Nadzor nad radom upravnog odbora vrši Nadzorni odbor, vodeći računa o specifičnosti sliva.

Nadzorni odbor nadležne organizacije riječnog sliva sastoji se od tri člana koje imenuje:

- dva člana gradonačelnik;
- jednog člana iz nevladinih organizacija koje se bave zaštitom životne sredine.

Način rada nadzornog odbora utvrđuje se poslovníkom.

Administrativni poslovi

Član 54

Administrativne, stručne i druge poslove u oblasti upravljanja zaštitom voda riječnog sliva, utvrđenog ovim zakonom, obavljaju organizacione jedinice nadležne organizacije riječnog sliva, utvrđene aktom o organizaciji rada i sistematizaciji radnih mjesta.

Rukovodioca nadležne organizacije područja riječnog sliva imenuje i razrješava gradonačelnik.

Sredstva za finansiranje rada nadležne organizacije područja riječnog sliva osiguravaju se u Fondu za zaštitu životne sredine, Budžetu Distrikta na području riječnog sliva u skladu s godišnjim finansijskim planom nadležne organizacije područja riječnog sliva.

Godišnji finansijski plan nadležne organizacije riječnog sliva donosi upravni odbor uz saglasnost gradonačelnika.

VI. NADZOR

Upravni nadzor

Član 55

Upravni nadzor nad primjenom odredaba ovog zakona i propisa donesenih na osnovu njega, sprovodi nadležno odjeljenje Vlade.

Inspekcijski nadzor

Član 56

Inspekcijski nadzor nad sprovođenjem ovog zakona i propisa donesenih na osnovu njega vrši inspektor za zaštitu životne sredine Vlade Brčko distrikta (u daljem tekstu: inspektor).

Zadaci inspektora

Član 57

Inspektor vrši nadzor:

- nad stanjem voda i vodnog režima;
- nad primjenom standarda emisija i zabrana;
- nad kršenjem zabrana opterećivanja voda i drugih zabrana i ograničenja određenih ovim zakonom;
 - nad ponašanjem pravnih i fizičkih lica i izvršavanju svojih obaveza utvrđenih ovim zakonom i propisima donesenim na osnovu ovog zakona.

Član 58

Inspektor je ovlašćen da rješenjem odredi:

- zabranu ili ograničenje ostvarivanja prava na vodu, ukoliko se to pravo ostvaruje bez vodozaštitne saglasnosti odnosno odgovarajuće dozvole ili koncesije, ili u suprotnosti sa njima;
- prekid izgradnje ili druge vrste korišćenja investitora ukoliko se ove aktivnosti sprovode bez vodozaštitne saglasnosti ili u suprotnosti sa njom;
- privremeni prekid aktivnosti, ukoliko su prekršene odredbe zakona;
- zabranu upotrebe postrojenja ili uređaja ukoliko se koriste bez vodozaštitne saglasnosti ili koncesije ili u suprotnosti sa njima;
- zabranu ili ograničenje ispuštanja ili drenaže supstanci u vode, ukoliko se ove aktivnosti sprovode u suprotnosti sa odredbama ovog zakona i vraćanje na prethodno stanje;
- uklanjanje nanosa iz površinskih voda, ukoliko se vrši protivno ovom zakonu;
- sanaciju štete i vraćanje u prethodno stanje;
- preduzimanje rehabilitacionih mjera za eliminisanje izvora i posljedica pretjeranog opterećenja voda ili predlaganje nadležnoj organizaciji riječnog sliva donošenje i sprovođenje programa rehabilitacije, u skladu s propisima kojima se uređuje zaštita životne sredine.

Žalba na rješenje inspektora ne odlaže izvršenje rješenja.

Usmeno rješenje

Član 59

Mjere iz člana 58 stava 1 ovog zakona inspektor može da odredi i usmeno, ako:

- postoji neposredna opasnost od zagađivanja vode do poteškoća u snabdijevanju vodom za piće zbog suše i drugih prirodnih događaja;
- postoji neposredna opasnost od poplava, bujica, klizišta, odrona ili lavina;
- vlasnik ili posjednik obalnog ili vodnog zemljišta ne dozvoljava prijelaz preko svog zemljišta ili izvođenje radova koji se odnose na zaštitu voda;
- postoje drugi razlozi utvrđeni zakonom.

Okolnosti iz stava 1 tačke 2 i 3 ovog člana, utvrđuju se prema propisima koji se odnose na prirodne katastrofe.

Vršenje inspekcijskog nadzora

Član 60

Inspektor ima pravo na nesmetan pristup obali ili vodnom zemljištu i pravo da uđe u vodoprivredna postrojenja koja su namijenjena posebnoj upotrebi ili korišćenju.

U vršenju nadzora nad poslovima koji vrši pravno lice, inspektor može od odgovornog lica zahtijevati da:

- omogući vršenje inspekcijskog nadzora u svim vodnim postrojenjima, nad svim postrojenjima i uređajima i na otvorenim prostorima pravnog lica;
- dostavi na uvid sve podatke i dokumentaciju potrebnu za obavljanje nadzora;
- obavijesti o preduzetim mjerama u vezi sa otklanjanjem utvrđenih nedostataka i nepravilnosti.

Pravno lice čiji rad podliježe nadzoru, dužno je omogućiti sprovođenje inspekcijskog nadzora, dati na uvid potrebnu dokumentaciju i pružiti sve potrebne podatke i obavještenja.

Ukoliko postoji sumnja da je počinjeno krivično djelo, koje se goni po službenoj dužnosti, inspektor će osigurati mjesto na kome je djelo počinjeno i tragove, ako postoji opasnost od njihovog uništenja, te o tome obavijestiti policiju.

Primjerak zapisnika dostavlja se pravnom licu kod kojeg je inspekcijski pregled izvršen.

VII. UČEŠĆE JAVNOSTI

Član 61

Na učešće javnosti i pristup informacijama u procesu zaštite voda po ovom zakonu, primjenjuju se odredbe Zakona o zaštiti životne sredine i odredbe ovog zakona.

Nadležna organizacija riječnog sliva podržava javni monitoring između ostalog i putem osiguravanja redovne obuke, opreme i profesionalne podrške za one koji sprovode ovaj vid učešća javnosti.

VIII. FINANSIRANJE

Finansiranje zaštite voda

Član 62

Finansiranje aktivnosti propisanih ovim zakonom se osigurava iz Fonda za zaštitu životne sredine, budžeta Distrikta, u skladu sa Zakonom o Fondu za zaštitu životne sredine.

IX. KAZNENE ODREDBE

Prekršaji

Član 63

Novčanom kaznom od 1.000 do 10.000 konvertibilnih maraka (KM) kaznit će se za prekršaj pravno lice, ako:

- ispusti otpadne vode direktno u podzemne vode (član 24 stav 3);
- indirektno ispusti otpad, odnosno emituje ili apsorbuje toplotu iz podzemnih voda suprotno zakonu (član 24 stav 2);
- ispusti otpadne vode u prirodno jezero, ribnjak, pojilište ili drugi prirodni vodni rezervoar koji se stalno ili privremeno uliva ili odliva u unutrašnje ili podzemne vode ili u vodne rezervoare koji su nastali kao rezultat ekstrakcije ili korišćenja mineralnih sirovina (član 24 stav 4);

- upotrijebi ili koristi vode iz prirodnog jezera, ribnjaka, pojilišta i drugog prirodnog vodnog rezervoara koji se stalno ili privremeno uliva ili odliva u unutrašnje ili podzemne vode na takav način da se unazađuje njihovo ekološko i hemijsko stanje (član 24 stav 5);
- đubri ili koristi sredstva za zaštitu bilja na obalnom zemljištu ili u zabranjenim zonama, suprotno zakonu (član 25 stavovi 1 i 2);
- prevozi teret ili plovi na naftni pogon na unutrašnjim vodama suprotno zakonu (član 26 stav 1);
- ispuštanje otpadne vode iz plovnih objekata direktno u vodu (član 26 stav 3);
- pere vozilo ili drugu mašinu i uređaj u površinskoj vodi ili na vodnom zemljištu (član 27);
- ispusti ili odloži supstancu ili predmet u vodu suprotno zakonu ili ispusti otpadne vode (član 28 stav 1);
- odloži ili pretovari opasne supstance u čvrstom, tečnom ili gasovitom stanju, odloži ekstrahovani ili otpadni materijal ili drugu sličnu supstancu ili otpad (član 28 stav 2);
- koristi vodu za opću upotrebu u području u kome je takva upotreba zabranjena ili ograničena ili je u suprotnosti s propisima;
 - ne omogući privremeno korišćenje svoga zemljišta;
 - ometa slobodan prilaz vodi preko svog zemljišta ili onemogućava opću upotrebu vode;
 - podiže privremene ili stalne prepreke na obali ili vodnom zemljištu čime se sprečava slobodni prilaz vodi;
 - onemogućava slobodan prilaz obali ili vodnom zemljištu javnim službama;
 - onemogućava rad postrojenja i mjerne opreme za istraživanje, iskopavanje i bušenje, testirno pumpanje, uzimanje uzoraka zemljišta i ostale radove koji se odnose na testove monitoringa i mjerenje supstanci;
 - koristi ili sprovodi aktivnosti na prirodnim vodnim rezervoarima uključujući močvare što bi moglo ugroziti njihov vodni režim ili prirodne karakteristike;
 - uklanja aluvijume u suprotnosti s propisanim uslovima, načinima i kriterijima ili krši obaveze ili način vraćanja aluvijuma i unutrašnje vode;
 - djeluje u eutrofskom području u suprotnosti sa odredbama ovog zakona;
 - koristi obale i vodno zemljište čime pogoršava režim ispuštanja;
 - ne preduzima aktivnosti radi sprečavanja negativnih posljedica vode na površinama koje su oštećene ili izmijenjene usljed građenja;
 - sprovodi aktivnosti ili koristi prostor u rizičnim područjima u suprotnosti sa uslovima utvrđenim u planu upravljanja područjem riječnog sliva;
 - ne preduzima aktivnosti ili koristi prostor u rizičnim područjima u suprotnosti sa uslovima utvrđenim u planu upravljanja područjem riječnog sliva.

Za prekršaje iz stava 1 ovog člana kaznit će se i odgovorno lice u pravnom licu novčanom kaznom od 500 do 1.700 konvertibilnih maraka (KM).

Novčanom kaznom u iznosu od 100 do 500 KM kaznit će se fizičko lice za prekršaje iz stava 1 ovog člana.

X. PRIJELAZNE I ZAVRŠNE ODREDBE

Podzakonski akti

Član 64

Podzakonske akte u skladu sa odredbama ovog zakona gradonačelnik će donijeti u roku od jedne godine od dana stupanja na snagu ovog zakona.

U slučaju da gradonačelnik ne donese propise u propisanom roku, dužan je da svaka tri mjeseca nakon isteka roka, podnese izvještaj Skupštini Brčko distrikta o razlozima zbog kojih propis nije donesen i preduzetim mjerama za njegovo donošenje.

Stavljanje van snage

Član 65

Danom stupanja na snagu ovog zakona prestaju da važe odredbe posebnih propisa koje regulišu pitanje zaštite voda, a koje nisu usaglašene sa ovim zakonom.

Stupanje na snagu

Član 66

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikt BiH".

Босна и Херцеговина

БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Broj: 0-02-022-170/04
Brčko, 30. juni 2004. godine

Bosna i Hercegovina

BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.